

河

防

芻

議

河防芻議卷之六

目次

古燕崔維雅惕庵父著

弟崔士章筠渭父訂

男崔喜麟燕公

崔徵麟鄭公

崔兆麟玉符

侄崔緝麟鍾紱

崔福麟子受

卷之六

或問

崔慶麟子餘全較

一治河治漕辯

一河決運道無阻辯

一高寶迤帶閘河辯

一引河未之前聞辯

一中州埽多蟄陷辯

一徐淮埽不蟄辯

一項衝外堤下埽辯

一埽灣不下埽辯

一引河不易成辯

一徐州以下分流辯

一中州何以分流辯

一黃河邳宿水緩辯

一翟壩不宜築辯

一翟壩有害泗州辯

一周橋不空開辯

一雲梯關入海空濬辯

一黃家嘴決口不塞辯

一引沁入衛辯

一駱馬湖開新河辯

一運河不用黃河辯

一黃河穿支河辯

一治河能保不決辯

一治河不出三策辯

一神河辯

一張福王簡口堤辯

初上疏染事空

再上緊要事空

三上緊要事空

總河題補河廳疏

總河題補河道疏

督撫薦語

或問辯惑

或曰

國家所重在漕今圖說中詳於淮黃而略于漕何也應之曰治黃淮所以治漕也蓋自清河以北桃宿數百里間所資以運漕者惟黃清河以南山寶數百里間所資以運漕者惟淮其間衝決淤阻能爲運道梗塞者亦惟淮與黃年來黃決七里溝迤帶淮決清水潭迤帶爲害最急故去

其爲漕害者則黃淮治而漕亦無不治矣若治運河之法與黃河異黃河濁水隨挑隨淤故人力難施裡河清水愈濬愈深故功效易見但守前人撈濬之法自可不患淺阻今現在節年挑濬故不必別言治漕也然則直隸山東迤帶河可不治乎曰

畿輔輦轂之地防守挑濬人自不敢緩從來河患惟中州最多若中州黃河疏築得法河流順軌

自可不爲山左患至臨清汶濟諸閘河則有潘  
季馴北河十議在此裡河舊制成法不變但守  
而勿失可矣

或曰治河以濟漕今桃清迤帶河雖屢決而運道無阻何必鰐鰐過計欲開引河築遙隄若是憂之深而慮之遠耶應之曰此真睂曉之見不顧其後何能及遠者也夫智者覩于未形患至而爲之防不若患未至而防之之爲愈也況河患潰決非屬未形其勢豈容待其憂何容已乎七八年以來桃宿上下告決頻仍東衝西潰旋塞旋決幸三四年來總河焦心勞思躬閱鳩工

總漕飭漕護河殲力共濟運道始免阻塞漕艘  
得以無悞蓋捲埽塞決爲救急之良法莫善於  
此然而爲經久之長圖則未可恃嘗屢奉總河  
委勘桃清大工周視相度屢經桃宿兩岸稔知  
清口雲梯關上下數百里河身沙墊高至二丈  
三丈不等河渠全沒夫下壅則上潰勢必橫溢  
于桃宿上源不至如故明萬曆年間崔鎮決口  
數十處不止黃旣全奪則清河以下竟成平陸

運道梗塞尚可言哉故今日黃決桃源諸處淮  
決清水潭與潘季馴當日形勢相類二年之內  
恐更有甚於今日者非如季馴大創興舉不足  
以弭患或恐工程浩大經費不支不知國家一  
日不可廢漕則一日不可廢黃一日不可不治  
漕則一日不可不治黃及今爲之猶可預備節  
省若待臨渴掘井則工不容已而費更不億祀  
人之憂不得不爲漕運民生鰥鶩過計也

或曰昔高加堰黃浦口之決潘季馴但築高堰  
塞黃浦口而淮已會黃由清口入海淮揚一帶  
田廬如故禾黍盡登今者旣議築翟壩閉周橋  
閘塞清水潭而又欲盡復涇河子嬰溝范公隄  
石礎白駒諸閘以入海濱达稻河以入江不重  
費矣乎應之曰築高堰塞翟壩者所以遏淮水  
之東行使不中洩開涇河諸閘濱达稻河者所  
以防湖水之秋漲使得下流昔陳平江伯瑄慮

五湖七十二河之水歲爲長隄患故置數十減  
水閘於長隄之間令丁夫時啓閉湖溢則瀉之  
以利堤湖落則閉之以利漕法至善也但減水  
閘止可以洩尋常盈溢之水至伏秋霪潦與天  
長六合諸山之水陡發入湖宣洩不及故後人  
於興化建白駒丁溪諸閘入海江都開金灣武  
稻河入江節宣有法旱澇有備斯漕運無阻而  
民田不至渰沒後因鹺司慮私販出入禁閘勿

啓而隣閘居民不利于開致各州縣官民人執  
一見閘口日堙日塞河路淤阻不行一遇秋漲  
湖水泛溢涓滴注之支河溯其出口不過一二  
湖港上口鯨吸不止不得不患腹脹之病潰漕  
隄而壞田舍高寶七邑且爲壑矣故必考求前  
人置隄之意只許浚深不許增高復陳恭襄平  
水閘之制聽其宣洩不待其羨溢而又濬海口  
及支河使入海達江此疏湖水之下流與塞淮

水之上流並行而不可緩者也如謂季馴當日  
何以不濬海口考當日季馴議復五塘謂民間  
承佃必須償貸及築隄建閘所費不貲又慮田  
高之民欲蓄田窪之民欲洩築隄之後盜決必  
多添官設夫種種皆難措辦故謂可緩亦非謂  
可已也且當日鹽院條議不欲開支河濬海口  
乃爲鹽場起見似有阻格難行者況其時議濬  
寶應月河議守八淺隄議歲防湖隄并開汎稻

白塔二河蓋鰓鰓以霪潦彌月山水併發爲慮矣爲政者苟利漕運利民生則毅然舉行豈能每人而悅之哉今總河業將黃浦等閘責成司道重建寬闊甚稻河閘亦俱改建通江涇河現議挑挖惟邵伯至清江綿長三百餘里建造石工所費不貲白駒等場年久淤淺工須有待

或曰引河之說未之前聞今行之而屢效信獨  
得之秘可謂發前人所未發矣亦有行之而不  
效者乎應之曰有之凡引河必相其勢之轉灣  
急溜之處始放河頭又必河勢迅激不變始可  
以衝刷淤沙引歸新河若河勢遷徙不定或自  
西而忽東或自南而忽北忽自西南而東北忽  
自西北而東南倘挑濬之時驟值其變遷則河  
流既緩而沙停河飽故引河亦有成有不成相

機應變存乎其人此又權不可以預設者也

或曰中州一帶遇有河患下埽護堤埽多蟄陷  
何也應之曰無他流急故也黃河自崑崙轉折  
數千里始自積石至龍門抵潼關至河南則伊  
洛渭沁諸水合焉水愈多勢愈盛三門折津以  
下地皆浮沙最易澗刷奔放平壤無崇山巨磣  
以防閑之旁激奔潰東衝西決自漢迄今河患  
未有不始自河南者建瓴之勢則然也遇有河  
患衝刷堤根下埽護堤水汛下趨掏刷泥沙愈

刷愈淺而埽箇不固自隨水淌瀉矣此中州水勢湍急下趨埽多蟄陷之故也

或曰徐淮一帶遇有河患下埽護堤而埽箇無  
蟄與中州不同何也應之曰河在中州其汛澑  
最急急則水勢下趨河至徐淮其汛澑較平平  
則水勢上行惟水勢上行遇有河患而水不下  
掏泥沙下埽護堤則埽箇有所憑麗自無蟄陷  
矣此徐淮河勢與中州不同而埽箇不蟄故與  
中州異也

或曰頂衝河患旣有內隄重障而必於外堤下  
埽何也應之曰河汎直射隄根坍刷莫禦此頂  
衝之勢也倘徒恃內隄重障而不急防外堤一  
時外堤坍盡則水入堤內兩堤夾束而水勢難  
容怒濤撞激更難抵擋內堤亦必潰決滔滔之  
勢必至於大潰而不可收拾矣惟外堤護埽以  
迎其溜水汎不得衝刷堤根則外堤旣免坍刷  
而內堤始得保固無虞耳

或曰掃灣河勢不下埽護堤者何也應之曰掃  
灣之勢河汛自外行正滔去堤根尙遠卽或水  
勢漲發溢於堤內盈至二三尺迨一時水消堤  
岸如故縱有潰決正河不得遽奪則一月之餘  
可塞遲亦不過兩月三月可塞倘不審河勢下  
埽護堤則埽不迎潘必隨水淌瀉徒費無益也

或曰引河之工安於中州然每見引河已成後竟報淤何也應之曰挑引之工後有被淤者以善後之計未得也卽如河勢自西南而來則引河下唇直當其衝汹湧之勢漸分但下唇塌刷無約攔水勢之力河流走大河易走引河難走大河溜走引河緩流緩則沙停沙停則河飽不免淤墊矣若使護埽下唇約攔河勢則河之入引也迅迅則刷深而沙不得停日漸深廣可以

成河故曰引河不易成成河安善後也

或曰徐州以下河患頻仍阻運病民則支河分流以殺水勢保固隄防何如應之曰徐州以下遇有頂衝堤岸潰決特從上流掃灣處引河分導庶決工易施則可耳若因河患頻仍議主分黃則河不兩行且土性堅勁此通彼塞此淺彼深大河被淤殊於通道有碍是河勢分行斷乎不可也

或曰徐州以下不宜分流然則中州引河往往得成何也應之曰中州土鬆直從上源倒灣處挑引建瓴之勢日刷日深日衝日澗新河既已分流大河既已淤淺力築截河大壩護埽禦衝新河合流以分之者合之也

或曰黃河在河南水急故決至邳宿以下則水緩而亦屢報決何也應之曰黃河湍悍之性建瓴而下其在邳宿桃清與中州無異且合睢水自洋諸湖水全會於淮其流焉得緩但河在中州其勢下趨故急在下水至邳宿其勢平行故急在上急在下所以蟄埽而埽費者多急在上所以衝堤而堤易至于潰此河勢在邳宿與河南但有下趨平行之分而無緩急之異也

或曰明季河臣潘季馴河防所記翟壩一帶不  
宜高築聽其河漲溢流分殺水勢以保高堰應  
之曰西南原霸高亢不宜增築此當年之地勢  
如是數年以來淮水旁洩舊壩衝刷計濶二十  
餘里淺淡一二丈不等自古溝至谷家橋夏家  
橋黃家壩一路多有衝決或爲溝渠或成河路  
既深且廣非復舊日地勢若復因循不塞則高  
寶一帶必至田產人民盡付波臣而且清口無

全淮之勢砥柱黃流運道俱成平陸矣翟壩等處今昔地勢之不同讀河書而不知變通猶膠柱而鼓瑟欲收底績之效難矣

或曰翟壩一帶果行修築則全淮未免壅漲泗  
州盱眙等處一望波濤不幾以隣國爲壑哉應  
之曰泗之有淮患猶黃之爲中州邳宿患其勢  
一也淮自桐栢挾汝颍肥濛等處七十二溪之  
水至泗州下流龜山橫截河中譬之咽喉之間  
湯飲驟下吞吐不及一時呃塞故淮至泗州則  
湧每歲伏秋皆然自古及今無異河防書載宋  
臣歐陽修先春亭記云暴莫大於淮蓋淮之爲

暴于泗久矣非因翟壩周橋高堰之開塞也且康熙元年以前翟壩周橋未開不聞泗州盱眙之民盡付波流况翟壩周橋修而清口通不惟不爲泗人之害而反爲泗人之利乎近年泗州盱眙一帶之人阻夫修築乃奸民黠商之尤者宜以盜決河防之律治之然則修築增高何如曰翟壩一帶係天然減水壩今日之成河雖不可不築也而當年之原壩仍不可不復若照高

堰一帶平高則束水過緊恐高堰壅潰滔滔東下勢必淤清口而阻漕艘此壩之修磚石灰砌照高堰之堤量低一尺有餘使漲水有所溢以還天然之壩基而可矣

或曰周閘之設其來已久宜開而不宜閉由是  
下流以濟漕高堰一帶可免潰決應之曰古人  
設立閘座以備宣洩其閘底以石爲梁閘上止  
留四尺水頭如滾水壩之制是以水大則洩水  
小則止因時啓閉潘季馴重修仍有石限其上  
不許過船後奸民利通客船漏稅夤謀建議將  
閘開深數倍改石限爲閘板以便私開私放私  
收船稅繼因泗州大水當道議開周橋洩之衿

民具呈到官工部黃曰謹有辯開周橋一疏事  
遂寢當時謠云東去只空開海口西來切莫放  
周橋若非當道仁人力十萬生靈喪巨濤自是  
周橋不復輕開近日翟霸旣決而周橋商賈船  
隻通行遂將淮水東洩而以二十餘里汪洋之  
水直衝漕河一線之長堤清水潭之決所自來  
也夫高堰之與周橋一堤耳特堰迤北而橋迤  
南者也堰以內之水與橋以內之水相聯一淮

耳特堰地稍低而橋地稍高者也若周橋可開  
則高堰可不守高堰必守而周橋獨可開乎無  
周橋是無高堰也昔泗州之民嘗請於潘季馴  
欲於周家橋至古溝數十里鑿渠通湖季馴謂  
如此開鑿成河淮水從此長流非特淮楊被害  
而清口亦將復淤正今日之左券也

或曰雲梯關爲入海之路向來寬闊約參貳百丈不等今爲黃河沙淤僅五六丈餘可不濬乎應之曰海無可濬之理前議已詳之矣但須急塞上流決口約束兩河復歸正道使水由地中沙隨水刷以水治水海口不濬而自通若以人力施之誠未見其可也曰上流幾處當治曰上流無處不當治稍有一處旁溢則水從中洩沙必淤澱河不順軌不能衝刷入海矣清口以上

桃宿諸決口修築自不必言其在安東境內則  
邢家口二舖口皆雲梯關要道所當急爲修築  
以束河流而疏海口者也

或曰黃家嘴屢次報決七里溝新莊口諸處此  
塞彼決徒費金錢塞之無益不如就決口開之  
順水之性則可不致他潰何如應之曰此卽萬  
曆年間崔鎮諸口之決議者欲畱決口之意也  
不知決口不塞則正河必奪桃清之間沙淤淺  
阻將何以資運若決可不塞前人早已行之潘  
季馴何以紛紛致辯共塞決口大小一百三十  
餘而後成功也然則不開決口亦復不治任之

何如曰漢李尋曾爲此言欲因河自決可勿塞  
以觀其水勢所居畎稍定自成川然後因天心  
而圖之必有成功此耑言治河不必治漕猶可  
耳今每歲四百萬糧艘命脈所係可任其所之  
衝決淤塞付之不治而已乎昔萬曆二十五年  
河決黃涸口總河楊一魁以河雖決渰沒民田  
無幾而河水一半足以濟運議不治又二年一  
魁入掌部事尙書劉東星代之亦守舊議如此

者三年河益南徙運道塞裳可涉漕艘至京往  
往後期乃往事之明鑒此皆浮議之當息者也

或曰沁水分流六十里卽通衛河若導沁入衛直達天津使河有所分其勢自殺則豫省無決防之患淮徐減長河之納可省歲修巨萬金錢不亦善乎應之曰沁河經行懷慶府河內縣出武陟下合黃河與衛河相去甚遠原無支流相通先年沁水衝開木欒店等處漂流民舍渰沒民田爲害甚大議者欲因衝決之道而遂引之以入衛不知沁大而衛小勢既難容沁濁而衛

清流必淤澱且沁高而衛下伏秋水漲必致衝  
潰當年沁河一決臨清東昌迤帶俱致淺澗是  
不減黃河之害而反爲運道之梗未受沁水之  
益而先爲衛河之災城郭人民俱患胥溺矣凡  
舉事須有利而無害利多害少猶不爲之況有  
害而無利乎前議已悉茲不再贅

或曰駱馬湖爲泇河運道咽喉當日泇河之議  
卽潘季馴亦以爲不可開至故明萬曆二十九  
年李化龍三疏始決開泇之計以內河二百六  
十里之捷避外河三百六十里之險至今賴之  
今欲於駱馬湖縣東峙丘等湖接連之處別開  
新河以利運道可避黃河之險豈非踵泇河之  
故事一勞而永逸乎應之曰清河以北數百里  
非黃不資運常居敬所謂閘河出口無處不與

黃會則無處不爲黃淤雖欲避而不得也自化  
龍開泇之後徐州運道已廢二洪之險可避故  
明崇禎八年東河水淺運復由徐叅議徐標於  
徐洪上流剏開月河與運河相連運得無滯

國朝漕運因之然運道雖東而徐之治河仍無虛  
日者蓋徐呂而下濟運必賴於黃故雖曰避黃  
而其實歲歲治黃歲歲治徐如故也當時化龍  
亦自言河隄處處安防御史駱駿曾亦言泇黃

兼濟而泇不可常恃且開泇之後河何嘗不決  
又何嘗不治黃而謂可一勞永逸乎然則即使  
駱馬湖新河可開亦仍不免治黃已屬重費而  
況新河未必可成恐費且無益故不如築堤治  
黃仍舊貫之爲愈也詳見前議中

或曰運河不用黃河之水惟賴洸汶沂泗足以  
濟之此先儒之言也其說謂自會通河至淮一  
路隄防只恐黃河之水衝入爲漕河之害今反  
欲用黃河之水而引之使來是引賊入室而以  
病爲藥也今曷不決黃入海而必欲資之爲用  
乎應之曰先儒此言蓋欲黃河由禹故道而謂  
山東汶水三分足以濟運故爲不賴黃河之說  
耳不知今日黃河日徙而南禹之故道已不可

復開水無源泉流易散而弱汶三分之水焉能歷數百里之遠且宿遷桃源河身皆廣數百丈濶二三丈不等汶河弱水能濟之乎向來運道半賴黃河潘季馴所謂歲漕四百萬石非藉黃不能浮舟此天所以默相而預闢此河以助之者也故漕運一歲不可廢則黃河不可一歲不來黃河不可一歲不來則不可一歲不治但資其利而避其害可耳

或曰曩時河自入海猶爲頽河州邑之害今黃淮合一而黃自秦晉兩戒如涇渭沁汴大小諸水復合焉其潰也必矣昔人欲分支河以殺其勢譬如百人爲隊則力全分而爲十則頓損又分而爲一則全屈矣何如應之曰黃河之性合則力專而流急故沙隨水刷而河日深分則力散而流緩故水滯沙停而河日淺所以然者黃流最濁以斗計之沙居其六若至伏秋則水居

其二以二升之水載八升之沙非極迅溜必致  
停滯若水分則勢緩勢緩則沙停河飽支河一  
開正河必奪河不兩行自古記之矣然則引河  
何以可分乎曰引河者因河決頂衝而爲之也  
頂衝河決乃過穎在山之勢非其本性故因其  
急溜而利導以分殺之使復歸于正而已矣是  
分之乃所以合之也

或曰河爲中原患久矣歲歲修塞所費無算今  
如圖說議引河議築隄事事如法能保其不決  
乎應之曰河至開榮以下地曠土鬆無洞庭彭  
蠡以爲之滙而伊雒渭沁諸水復合之其奔騰  
衝決勢所不免所謂黃河無十年不變之理也  
禦河如禦寇善治兵者不能必寇之不來而恃  
我有以待之善治水者不能必河之不決而恃  
我有以防之是故寬立隄防攔約水勢而又因

勢疏導使不至于橫溢則河可以無決卽使偶  
決而有備無患旋決旋塞可以刻期竣事而束  
水歸漕範我馳驅亦不爲災矣自宋迄明河決  
之患歷歷可考雖以潘季馴之治績亦不能保  
河之不變但歲修不廢自可久而勿壞故語治  
河于今日但有補偏救敝之法而無一勞永逸  
之功如必好奇喜新則宋人回河之議可爲永  
鑒矣

或曰古今治河者不出賈讓三策其上策欲徙冀州之民當水衝者放河使北入海中策欲多穿漕渠分殺水怒開建水門以資灌溉若繕完故隄增卑培薄勞費無已此最下策今皆不出其上中二策而獨取其下策何也應之曰時不同也漢之時專治河不治漕且河去故道未遠故放河之說尚可行然數千年以來終無有行者地廣人繁重遷民也況今日河自西而東而

南已非當日之故道即使故道可復將越數省  
郡縣之人民廬舍田畝墳墓而盡徙之乎是河  
且氾濫于中國而爲億萬生靈害也其能之乎  
或謂從河南銅瓦箱決之使趨東海勢若建瓴  
則河南徐邳永絕河患然而

國家數百萬之漕糧賴之以轉輸可令其中斷乎  
或謂京畿瀕海地多沃壤西北水利一開則漕  
運可省即使漕運可省而南北二千餘里河道

血脉可以不通上用織造進貢船隻郵傳往來  
商賈貿易可盡廢乎故昔日之河徙而北今日  
之河徙而南昔日之河惟欲去其害今日之河  
兼欲資其利此今昔時勢之不同也至多穿漕  
渠之說止可行之秦晉峽中上源河清之地若  
河南則水少沙多一灌田中禾爲沙壓盡成沮  
洳何可耕乎惟有寬立堤防攔約水勢使不至  
橫流肆溢水由地中行則防之乃所以宜之也

考之禹貢云九澤既陂四海會同傳曰九州之澤已有陂障而無決潰障卽隄也則禹之導水亦用隄矣賈讓之下策乃今日之上策也

或曰神河之說信有之乎曰四瀆視諸侯凡風雨山川莫不有神以司之漢武投璧宋用太牢國有常典何可誣也但君相之責必盡人事不可諉其事於天而聽之於神如漢瓠子之決田蚡以爲天數遲至二十年武帝躬臨築塞卒以成功堯有九年之水雖曰天數非大禹乘四載疏九河八年於外豈能地平天成故治河者耑言人事不言天與神蓋修築隄防勤劬濬導人

謀卽是神謀盡人事卽所以合天心也詩曰懷  
柔百神及河喬嶽

天子聖神有道於神且懷柔之惟是以死勤事能禦  
大災能捍大患則祀之此酬庸報功之典有其  
舉之不可廢耳

或曰高堰築而清口可通張福王簡口任其疏  
洩何如應之曰清口爲黃淮交會之所須令全  
淮之水盡從此出然後力能敵黃不爲沙墊昔  
人慮淮水從張福王簡二口洩出則淮水之勢  
分而力微且黃強淮弱則黃可以躡淮之後而  
倒灌以病漕故又築張福二堤以防其決使淮  
不外出黃不內入而清口之力始專當日黃曰  
謹辨開周橋疏內亦有欲弛張福口堤者曰謹

辨之甚悉但欲於張福堤極窪處所建減水閘  
二座黃漲則下板以遏黃之內浸淮漲則起板  
以縱淮之外出黃淮並漲則堅守數日俟其消  
而節宜之則淮水漸消而泗水亦不患漲其議  
可採也

桃源七里溝大工關係漕運民生事機重大雅  
康熙十一年十二月奉總河委勘於工次先上  
疏塞事宜八款後又兩上緊要事宜至再至三  
總爲

國儲民命淡切杞憂幸荷總河虛懷信任邀有成  
績今并錄於後

初上疏塞事宜

一曰廣備物料決口劇工需料殷繁宜多方積儲

庶免臨渴掘井之患查決口尚濶四十餘丈除  
椿榦芟纜等項計工另備外柳束須五十萬蘆  
葦須三十萬草須六七十萬始克有濟倘所備  
不如其數工至合尖之時捲埽套壓停工待料  
前工徒費時去莫追矣關係不小急宜廣備以  
收萬全之功

一曰酌用物料辦運柳束千萬艱難若不設法撙  
節無論工程緩急一槧鋪用將來合口緊工之

處需柳反缺悞工匪輕目今決口尚寬除底埽  
用柳外其餘套埽儘可柳七葦三如埽牛填墊  
埽眼還可均用葦草待進工至口門僅寬二十  
餘丈之時不但底埽用柳套埽亦必需柳然後  
將前此所省之柳用之於此庶閉口之工不至  
乏柳捍禦有賴矣

一曰堅固堤埽查新築埽工在外邊埽僅止一層  
力量單薄不堪捍禦須傍埽工裏面創築截堤

一道底濶八丈高先做八尺卽外河水勢不免  
浸透而內有截堤保障堤堅埽固較之外加邊  
埽功必倍之矣

一日善挑濶之宜所挑引河規模狹淺水勢難于  
建瓴流緩沙停斷斷不免河流不分勢必全河  
仍衝決工無論合尖甚難卽僥倖閉合轉瞬漲  
發衝激特甚豈得無虞殊切杞憂急將引河之  
身挑濶一十五丈深一丈二尺庶乎河流可以

分行而築工乃得保固矣

一曰籌河頭之勢河頭係河流進口之處必口門倍加寬濶方能引納河流濶須二十丈長十五丈深一丈二尺始爲得勢狹則拒河于口外矣再查河從西北向東南注射須于河頭南岸下截河埽三四個使河流不至旁溢而勢得約束入于新河河勢入漕衝刷有力決口之勢自弱矣

一曰挑坑溝以引衝刷河渠既寬既深似可通流矣但恐河流平行衝刷不迅難免沙停水緩之虞必須于渠身內另挑大坑五個濶三丈長三丈深五尺又挑橫溝五道並濶十丈長三丈深五尺一溝一坑相間施工有此層層坑溝則河水入渠自然跌蕩衝激河渠滔滔日深兩岸開刷日濶新河既成則決口必然淤淺得免蟄陷復潰之患矣但坑溝內泥水難挑須分築上埂

用戽淘運便于挑掘查挑過渠身寬十二丈深  
五六尺矣此時增濶三丈以足十五丈之數再  
挑濶六尺以足一丈二尺之數約長不過一百  
丈此一百丈之工而有全渠之用必照議力行  
無惜小費斷斷成河決口閉合可保無虞矣

一曰慎開導以乘時候引河之開導有時不宜早  
亦不宜遲必俟決口將閉河水陡漲新壩受敵  
岌岌難保之際卽將新河頭立時開放則河勢

正在盛溢其就下建瓴自然滔滔莫禦新河可  
一日而成則築工可一勞永固此乘時施工因  
勢利導間不容髮者也

一曰杜旁瀉以歸正流南壩正當迎澑查埽壩迤  
南有舊溝一道龍門將閉之時壅水淜漲則河  
勢直射臨壩舊渠崩潰可虞此處須嚴加鞏固  
宜加護邊埽厚築堤壩以遏衝激旁潰庶河勢  
得以全力注于新河堤壩堅牢得免意外之患

矣

以上八款

康熙十一年十二月初十日工次勘視確議

再上緊要事密

昨議引河河頭開闊二十丈河身闊十五丈深一丈二尺於一丈二尺完工外仍掘溝坑數道矣但計此河其長不過百丈耳查東南一帶河身淤成平陸者約長數十餘里今僅以百丈之河頭引納全河節短勢蹙猶慮河頭開放所淤之舊河衝刷不動如之奈何乃或謂舊河淤平尚屬新淤土嫩可以衝刷似矣所慮河頭開放

太早則全河大勢仍走決口其勢極順何以言之蓋決口河身深二三四丈不等而新挑引河其深不敵決口一半水性就下豈有棄深而就淺者將引河一開而數十里之平淤端然如故勢所必有倘一淤淺前工盡費而決口新壩之衝激何以抵擋其前車不可鑒乎雅前條議中於開放事安極言萬不安早又復切切面陳憲臺業已瞭然今爲萬全之計除一百丈急請照

雅

所議刻日完工外再於百丈外東南一帶接

挑二百丈寬三丈深六七尺其二百丈內如前  
法再掘坑溝十四五個以補接河身衝刷之勢  
使之長往莫禦及其開放時候仍必采

雅

未議

俟決口不過四五丈河流漲溢之時然後開放  
引河庶免淤淺之虞若決口未到四五丈萬不  
可先開反引淤澱也至將開口之際必須先下  
截河埽三四個約攔水勢亦屬最爲緊要皆宜

預備

又杜旁瀉一欵關係甚重若不及時照議綢繆則決口漸窄全河仍衝南壩萬一所慮旁瀉之舊溝突然衝動不但南壩衝激可慮併取土地方亦成河身矣春月南壩之覆轍昭昭可鑒也此壩宜築高一丈二尺寬十丈外下邊埽隨蟄隨套庶可免于旁瀉之患耳

查北壩之西地勢頗低計長不過十有餘丈宜

築一堤底濶七丈高八尺頂濶二丈五尺以補  
低窪以防叵測

前議大壩之內築截堤一道目今宜耑在北壩  
施工蓋因北壩之內河水不深易于建工若南  
壩之內回溜水深截堤不宜驟舉也又查南壩  
邊埽不過一層力量單薄急宜再加一層以防  
衝激此皆萬不可緩者也

以上數款十二月二十日途次再呈

三上緊要事宜

前詳勘兩壩北壩外護邊埽內築築堤前已陳悉但所築之埽壩急須加高六七尺壩之北頭耑用土築而北壩之近龍門者尤宜加埽但所鋪之埽止宜用葦草捲下其柳梢不宜濫用耳若使目前埽壩未蟄漫不加工及工至合尖之時河勢盪激埽壩必至蟄陷一時搶築無及則豫先綢繆施工不容刻緩

再思南壩所築較之北壩漸高目前可恃唯是  
河勢衝射南壩較之北壩尤甚綢繆捍禦倍空  
周詳壩之南半空加土築而近龍門合口之處  
宜加套埽亦如北壩總用葦草捲護上面再加  
土築可也至于外加沿邊大埽須並峙兩層庶  
幾壩身鞏固所費物料雖奢然全河迎澑要害  
緊關不可不萬分加意施工者耳

前議引河頭挑濶二十丈而河身濶深一切事

空業已備陳矣但河頭開放之機宜尚有未盡  
者切以臨時開掘河頭口門宜在西北上頭開  
掘十五丈而臨截河埽四五丈不必開掘何以  
言之從二十丈之上頭開放則河流入口有倒  
瀉之勢湍悍衝刷自澗自深可以成河倘從河  
頭截河埽處輕率錯開則全河直衝截河埽壩  
所慮旁瀉之舊溝難免衝透將挑成之溝渠反  
不得全河直瀉之勢矣是開放之機宜不可不

審度慎重者也

前議河頭東南下截河埽三四個以約攔水勢  
矣然下埽之法尙未詳悉也今思將開引河數  
日之前先須掘槽長十四五丈深一丈五尺濶  
一丈四尺鋪埽高一丈二尺先將此埽推入槽  
內打椿六七株又鋪第二埽高一丈長與底埽  
同鋪完推入槽內正壓底埽打椿五六株若截  
河埽下或河勢衝刷埽個蟄陷再急急鋪埽套

壓

又思截河埽個臨河頭宜向西北不宜向東北  
何以言之蓋埽頭向西北者迎着河勢使全河  
入于引河之內衝盪有力倘埽頭反向東北如  
人之下唇反垂不得收約攔水勢之功矣此中  
機宜毫釐千里萬不可錯也

又思兩埽進埽晝夜無停則正月二十間決口  
不過寬十餘丈耳決口漸窄則河勢必漸射引

河河頭並南壩所慮杜旁瀉舊溝河頭兩處河  
頭河勢皆在衝激則引河頭之截河埽與杜旁  
瀉之護邊埽俱宜于正月二十前掘槽下埽萬  
不可遲恐遲則河勢衝射坍塌不止倉猝難以  
施工致悞大事不可不鰥鰥過計預先拮据者  
也

以上前後芻議雅親勘真確切實敷陳非同  
泛泛揣摹條議者比也但從來有治人無治

法所慮在工員役意見不同閱歷生熟有別  
或議論互異在憲臺當自有特鑒不爲浮說  
所搖則河工幸甚運道民生幸甚矣

康熙十二年正月初八日三上事宜

總督河道提督軍務兵部尙書兼都察院右副  
都御史臣朱之錫題爲

請補河官以重河防事該臣看得治河一官貴於諸

習臣前慎重河工職守一疏已經

題明伏奉

諭旨欽遵在案況歷來河患中州爲甚乃臨省管河  
道北河同知俱係新任歸德通判亦伏經臣叅  
處臣正切杞憂移會撫臣賈漢復從長酌議而

南河同知趙汝斌又以積勞病故矣一道三廳悉更生手無論來者果否勤敏總未可知即使凡百究心亦必需之月日河工水汛節序相催事幾之來間不容髮是何可以嘗試僥倖爲也查原任儀封縣知縣崔維雅任內修防歷著成績且新陞淮安府同知以之改補南河同知銜亦相當臣恐所見不確又經咨會撫臣移伏僉同合無請

勅吏部將維雅改補趙汝斌員缺一轉移間而素所  
通曉較之茫無頭緒者得失不啻徑庭矣謹會

同撫臣賈漢復合詞具

題伏乞

勅部議覆施行

順治十六年十月內具

題奉

旨吏部議奏

總督河道提督軍務兵部右侍郎兼都察院右副都御史加一級臣王光裕題爲循例請補河

南管河道員以重緊急河防事切照河南爲黃河上游而管河道司全省河務先事不周則終年貽害臨期失着則補救彌難臣於四月間履

任念切黃河止以淮揚水患工程爲急隨卽南北出勘工然寸心無刻忘豫州也臣於本年七月

十三日據河南按察使李士禎呈報管河道僉

事邵燈病故於十八日准河南撫臣郎廷相會  
稿會題邵燈病故除行河南布按二司作速遞  
官署理并查取邵燈病故印結及有無經手錢  
糧另報外惟是河道一官爲上原修防機宜關  
係非得練習周詳而又能挺身任事熟諳河防  
者未易勝任臣於奉

旨安輯浙海時目擊寧波府知府崔維雅當兵馬雲  
屯之地而調劑得宜其歷任由儀封知縣開封

府南河同知而陞方面者

臣

心識其才今河南

河道員缺正值伏秋黃漲之會臣憂心如焚不

能飛越親督因崔維雅兩任河南修防歷著成

効若以之就近陞補相應職銜誠爲駕輕就熟

則用素所諳練較之初歷生手茫無頭緒者得

失不啻天淵矣臣從河道緊急修防起見謹會

同河撫臣郎廷相循例合詞具

題伏乞

勅部議覆施行奉

旨該部議奏

順治十二年十二月內總河楊方興

題爲請定督撫舉劾之例等事薦得儀封縣知縣

崔維雅

夫柳獨能早完錢糧絕無加耗嚴明而積胥知  
畏均平而災黎頓甦

順治十四年八月內巡撫河南亢得時

題爲請定督撫舉劾之例等事薦得儀封縣知縣

崔維雅

以明辨通敏之器著規畫拮据之能三家莊河  
工尤其顯績

順治十四年冬月內總河楊方興

題爲封丘縣大王廟大工告成敘得儀封縣知縣

崔維雅

刻意捍黃夫柳立辦部覆奉

旨加一級

順治十六年八月內總河朱之錫

題爲請定督撫舉劾之例等事薦得儀封縣知縣

崔維雅

剗裁無滯鼓勵有方挑引河而廻將倒之濶廣植柳而儲不時之用

順治十八年 月內總河朱之錫

題爲請定督撫舉劾之例等事薦得開封府南河

同知崔維雅

沿河之荒度必周徵派之怨尤不避至於搶救

槐疙疸露宿竣工勤勞尤爲難況

康熙三年二月內總河朱之錫

題爲請定督撫舉劾之例等事薦得開封府南河

同知崔維雅

沿河三百餘里奔馳風雨不費絲毫之帑克平  
泛濫之災勞績難況

康熙十二年八月內總河王光裕

題爲桃源七里溝大工告成特敘得分司季滿張

有傑驕漢納錫管河道副使崔維雅戴聖聰等  
或出入於荒山險峻之地採柳運料心手俱瘁  
或奔走於豫東淮徐之間督柳催船風雨忘勞  
或終始在工督催無懈此皆材幹敏卓勞苦倍  
常者部覆奉

旨各加一級

河防芻議卷之六

終